

續
文
獻
通
考

續文獻通考卷之九十六

皇明進士雲間王圻纂輯

職官考 國朝東宮官王府官太孫官 進奏院

司隸 都督 元帥 宣慰 宣撫

東宮官

皇明

詹事府建置 洪武初置大本堂取古今圖書充其中

召四方名儒教 太子 親王諸儒專經而授分番夜

直已而 太子居文華堂諸儒臣迭班侍從又選才俊

之士入充伴讀時時 賜宴賦詩商確今古評論文學

富是時 東宮官有同知詹事院事副詹事左右詹事

丞左右率更令率府使副使同知左右率府事諭德贊
善文學中舍正字侍正洗馬庶子皆勳舊大臣兼之不
別設府僚已又改贊善爲贊善大夫設贊讀 十年置
通事司設司令司丞 十四年設左右司直郎左右清
紀郎 十五年置左右春坊各設大學士又置司經局
設洗馬校書正字 二十二年以官聯無統始置詹事
院 二十五年改院爲府正三品左右春坊正五品司
經局從五品皆列署府中而事皆總于詹事府時春坊
翰林院日二人進講尚書春秋資治通鑑大學衍義貞
觀政要諸書纂述始終直陳大義輯成篇章呈上 覽
已乃赴 文華殿講說三師三少詹事府鴻臚寺官各

一人給事中一人侍講畢同辭而出 召問則諸侍官
同人有獨進及留身者給事中鴻臚寺司直清紀郎劾
奏 二十六年選秀才張宗濬等隨詹事春坊官分直
文華殿侍講畢進說民間利害田里稼穡古今孝弟忠
信文學材藝故事 命廷臣舉孝義篤行之士爲 東
宮官屬遂以鄭濟王勲爲左右庶子 建文中增少卿
寺丞各一人賓客二人又置賢德院設資德一人資善
二人其屬贊讀替書著作郎各二人掌籍典 各一人
靖難後復故 仁宗在 東宮侍官臣有恩禮燕勞
慰問如家人父子然然官臣亦爲 宗藩所讒時時得
罪繫獄或殞命 英宗初大臣上講讀儀大抵尊君卑

系三庫通考 卷之九十六
臣非復 祖宗之舊

本府詹事一人少詹事二人府丞二人其屬主簿一人
錄事一人通事舍人二人吏四人左春坊大學士一人
左庶子一人左諭德一人左中允一人左贊善一人左
司直郎一人左清紀郎一人左司諫一人吏一人右春
坊亦如之司經局洗馬一人校書二人正字二人吏一
人

詹事以輔導 東宮爲職少詹事寺丞爲之貳凡侍
東宮講讀暨坊局翰林院番直凡講讀畢又奉 上所
處分府部軍政要務及撫諭四夷恩義率其僚屬暨坊
局陳說於 東宮府院官得互燕凡試士修書皆與焉

坊局亦如之主簿典勾會文移檢稽脫失錄事佐之通事舍人典 東朝叅謁辭見之禮及承令勞問之事

左右春坊大學士典 東宮上奏請及下啟箋講讀之事審慎而監省之庶子諭德中允贊善各奉其職而從焉凡 東官監國撫軍出狩及朝會出入覆啟畫諾審署移詹事凡諸祥青若伶僕改變新聲導達非禮者必陳古義申典制糾正而請遠斥之凡內外庶政可爲規諷者隨事贊諭焉司直郎掌彈劾宮僚糾舉職事清紀郎叅佐之司諫掌箴誨登誡之事以拾遺而補過焉洗馬掌經史子集制典圖書刊緝之事立正本副本貯本以備進覽凡天下圖冊上 東官者皆受而藏之校書

正字堂繕寫裝潢經史子集制典圖書詮其訛謬調其音切以佐洗馬

事例

太祖洪武元年春正月以李善長等燕 東官官先是劉基陶安皆奏適聞中書及都督府議倣元制設中書令欲奏以 太子爲之請勿聽 太祖曰取法于古必擇其善者而從之元氏胡人事不師古設官不以任賢惟其類是與豈可取法且吾子年未長學問未充更事未多所宜尊禮師傳講習經傳博通古今識達機密他日軍國重務皆令啟聞何必效彼作中書令乎乃 命詹同取 東官官制觀之謂同等曰 朕今立 東官官

取 廷臣勲德老成者兼其職老成舊人動有與則若
新進賢者亦選擇參用同對曰 陛下立法審憲之意
實深遠矣於是以左丞相李善長爲 太子少師右丞
相徐達爲 太子太傅俱詹事中書平章錄軍國重事
馮勝燕右詹事胡廷瑞廖永忠李伯昇兼同知詹院事
趙榮王溥同知副詹事楊憲傅瓛燕府丞常遇春兼
太子少保鄧愈湯和兼 太子諭德劉基張瑄兼 太
子贊善大夫文原吉范顯祖兼 太子賓客 上諭善
長等曰朕於 東宮官不別設府僚而以卿等兼之者
蓋軍旅未息 朕若有事于外必留太子監國若設府
僚卿等在內事當啟聞 太子或有聽斷不明而與卿

等意見不合卿等必謂府僚導之嫌疑由是而生朕
所以特置賓客諭德等官以輔成太子德性且妙選
名儒爲之賓友昔周公教成王告以克詰戎兵召公教
康王告以張皇六師此居安慮危不忘武備蓋繼世之
君生長富貴溺于安逸軍旅之事多忽而不務一有緩
急罔知所措二公所言不可忽也五年冬十二月丁
酉擢宋濂爲太子贊善大夫時濂授太子經相待
日久濂亦忠誠彌篤太子一言一動皆以禮法諷諭
使率于道義每讀經史至有關係政教及前代興亡之
故必拱手正對曰君國子民之道當如是不當如彼
且推極于人情物理太子每歛容嘉納之久之敬禮

永嘗少衰有言則曰師父師父云

仁宗洪熙元年春贈故宮僚左贊善徐善述

浙江天台人字好古爵

謚仍

命有司歲春秋祭之又贈贊善王汝玉

蘇州人

太子賓客謚文靖遣官祭之帝在東宮久宮僚極其
禮遇而善述被詩文寶翰之賜尤多善述遂于經學
且工爲詩以薦授桂陽州學正秩滿陞國子助教時同
官侯復性最褊急善述婉曲諭之復自是忿戾消沮
每遇善述輒嘆曰我見公心輒歡如陶飲今吾之叔度
也至是簡入宮僚爲左春坊左司直郎帝遇之厚
尋陞右贊善一日降令旨云說與好古爾將選詩內
取易入手解意的分類賦比興二字每字要十六句八

首十二句八首八句八首爾爲選擇明早進看又聞卿
染病可稍得痊否乃冬寒善加湯藥順時將息 旨不
多及又一日致書云余今欲學作表卿可一如詩題立
例意思余爲之構文請益好古具詩題與表題間日封
進以廣琢磨今晨覽卿爲余所改之詩甚是手采清雅
真有益于日新但卿疾不痊未及存問日見煩擾豈尚
古優待老年才望之士乎然優待之心豈忘朝夕但卿
今年遇恐余爲學有日似卿朴直苦口者百無一二而
諛順顏者比比有之故特相爲觀縷者爲卿才德直審
趣卿康健篤于其事卿無憚勞弼余成業望藥石之言
日甚一日無負犯鱗觸諱之慮若余成學報答之禮豈

得忘之春暖猶寒當善爲湯藥順時將息以慰余懷
旨不多及冬至又賜以詩云清朝盛文治輔德資儒
耆念彼筋力倦趨朝諒非宜賦詩有嘉致納誨多良規
起予得深趣歡懷浩無涯新陽值初復况此承平時酬
勞見尊酒庶以勞期願永樂已亥冬十月卒帝感之
勸手爲文祭之有卿偉量宏淵博覽古今正宜佑余文
學匡余政治豈期一疾遽然而逝哀哉痛哉不復聞卿
贊益之言諸語及卽位元年贈太子少師謚文肅金
實叙文肅公誅辭稱公以純粹博雅之學勁正脩潔之
行和而不可同謙而不可踰所謂有德有言者矣雖不
及柄用以大其施而當儲君毓德之日能以聖賢治心

修身之道引翼取信卒光身後之名奚負所學哉

王鑒論東宮官云昔者成王幼在襁褓召公爲太保周公爲太傅太公爲太師所以保其身體傳之德義道之教訓此三公之職也又置三少曰少保曰少傅曰少師與太子宴遊者也又選天下端正孝悌博聞有道術者以翼衛之所以與居處出入者也逐去邪人不得見惡行故太子生見正事聞正言行正道前後左右皆正人也其身有不正者乎古之教太子者其制如此今國家之東宮官以序進未必皆天下之選學之日展而授書授畢而退日中進講講畢而退况祁寒暑雨學皆間歇間歇之日所與宴遊者誰歟所與居處出入者誰歟

不可得而知也又近世之弊患在上下不交然爲太
子亦且未同於爲君今也則已儼然端默有言且不敢
進又况爲君之日乎求上下交而德業成胡可得也昔
者三王之教世子必齒于學國人觀之曰將君我而與
我齒讓何也曰有父在則禮然然而衆知父子之道矣
其二曰將君我而與我齒讓何也曰有君在則禮然
然而衆知君臣之義矣其三曰將君我而與我齒讓何也
曰長長也然而衆知長幼之節矣此所以學爲父子君
曰長幼之道而與人同如此下至漢唐此意泯矣然明
帝受尚書于桓榮及爲天子執轡而饋執爵而酹唐劉
洎岑文本馬周迺日往東宮談論治道李泌與肅宗爲

布衣交出則聯轡寢則對榻 國朝洪武初建大本堂
取古今圖書充其中延四方名儒教 太子 親王分
番夜直才俊之士充伴讀時時 賜宴賦詩商確古今
詳論文學無虛日 仁宗于潛邸臣嘗伏覩其教令長
至宴勞 東宮之臣如家人父子有從學詩學表至有
以暗透明之喻則 本朝之初亦未嘗如今制也 英
宗幼冲當時大臣無深識遠慮阿時所好名爲尊君卑
臣非 祖宗之法本然今雖未能如古之制亦宜稍畧
君臣之儀敦師友之分使 宮僚日侍左右從容誦讀
講讀之暇宴飲出入起居皆得周旋其間至暮乃退或
有剪桐之戲隨事諫止 宮僚有失從三師糾正之甚

者斥逐邪人不使得預其間如此所謂一人元良萬邦以貞三代所以長久者用此道也

本府堂上官與翰林院官互兼職事而凡講讀纂脩考試等官皆與本院同坊局雖各有印然事則詹事統之自永樂十九年定鼎北京以後南京詹事府不設官止設主簿一員然詹之爲言省也給也省給太子之家詹事之職於內外衆務無所不掌少詹事則貳之丞則掌文書以贊之通事舍人掌通謁賓贊禁令之事主簿掌勾稽錄事傳遞其詹事輔導自聖祖首取廷臣勲德老成兼其職且諭老成人動有典則舉用賢才立國之本崇德尚齒尊賢之道輔導得賢人各盡職故連抱

之木必以授大匠萬金之璧不以付拙工蓋見 聖謨
宏遠昭如日月

國初以兵部尚書唐鐸爲諫議大夫耆儒劉靜關賢爲
左右司諫兼春坊左右庶子趙肅何顯周爲左右諭德
洪武壬申始定爲詹事府而諫院專屬之六科十三道
云

世宗嘉靖二十三年南給事中游震得上疏云古之元子
皆齒于學所以教讓也 皇祖制禮意本諸此臣以爲
東宮官屬莫非人臣似不可以當荅拜之禮欲延聘
德望素著致仕大臣年八十或七十以上者數人賦之
廩餼不復授官任事但取其體貌老成儀度莊重足爲

皇太子賓禮使之入侍左右蓋致仕乃事外之臣言
若無官守之寄優之拜禮稍似相宜

按尊師之禮在宋朝亦有故事若夫學焉而後臣之古
聖王已然矣今東宮答拜所謂學也他日嗣統君臣
禮儀自存所謂臣之也正合帝王盛節若以臣言則市
井草莽皆臣也可以致仕而謂其非臣乎

穆宗降慶六年二月以東宮出閣講學命太子少

保禮部尚書兼翰林院學士高儀吏部左侍郎兼翰林
院學士張四維司經局洗馬兼翰林院修撰余有丁右
春坊右贊善兼翰林院編脩陳棟充侍班官詹事府少
詹事兼翰林院侍讀學士馬自強陶大臨翰林院編脩

陳經邦何洛文檢討沈鯉張秩充講讀官檢討沈淵許國充校書官制勅房辦事大理寺左寺正馬繼文徐申充侍書官先是大學士高拱等請選東宮輔導官僚會同吏部推舉有旨宜加慎選不必備員于是拱等疏名以聞上從之仍輪拱居正提調各官講讀今上萬曆二十五年禮部題據會典所開再爲參酌其每日講讀俱應照常惟新春第一次出講當照累朝已行事例備東宮出閣之儀是日早侍衛如常儀內侍先設皇太子座于文華殿之東廂房正中西向設書案于座之左禮部鴻臚寺官候皇太子出閣導引至東廂房升座提調輔臣并侍班講讀等官以次序

立冊墀行四拜禮畢各官以次入東廂房分班相向立
鴻臚寺官贊起案通事舍人以講案進內侍展書侍讀
官進讀讀畢通事舍人徹案賜酒飯各官叩頭而退
上是之 三十年正月二十四日 內閣推詹事郭
正域周應賓充 皇太子侍班官原任祭酒方從哲量
陞詹事充講讀官侍讀史繼偕編脩楊繼禮充授書官
其見任侍郎曾朝節歷任八年自合加銜奉 旨 東
宮開講講讀侍班等官照隆慶六年例行內方從哲原
係告病去任還着另推見任的一員供事其卿等提調
十日一輪侍吏部知道

王府官僚

前考無

宋寧宗嘉定十四年復置諸王宮大小學教授

遼肅祖長子洽脊之族在五院司叔子葛剌季子洽禮及懿祖仲子帖剌季子裏古直之族皆在六院司此五房者謂之二院皇族玄祖伯麻魯無後次子嚴朮之後曰孟父房叔子釋魯曰仲父房季子爲德祖德祖之元子爲太祖元皇帝謂之橫帳次曰刺葛曰迭剌曰質底石曰安端曰蘇皆曰季父房此一帳三房謂之四帳皇族二院治之以北南二王四帳治之以大內惕隱皆統于大惕隱司大內惕隱司掌皇族四帳之政教官曰大內惕隱曰知大內惕隱事曰大內惕隱都監 大橫帳常袞司掌太祖後九帳皇族之事官曰橫帳常袞曰太師

曰太保曰司空曰郎君曰知事 孟父族帳常衮司掌

蜀國王巖木房族之事 仲父族帳常衮司掌隋國王

釋魯房族之事 季父族帳常衮司掌德祖皇帝三房

族之事 四帳都詳穩司掌四帳車馬之事官曰都詳

穩曰都監曰將軍曰小將軍分橫帳孟父帳仲父帳季

父帳四詳穩司 舍利司掌皇族之軍政

納牛馬得裹頭巾者曰舍利

官曰舍利詳穩曰都監曰將軍曰小將軍曰舍利曰

將軍 親王國官制未詳下有王府近侍王府祗候

大東丹國中臺省

太祖天顯元年置聖祖乾亨元年省

官曰左大相曰右

大相曰左次相曰右次相 王子院掌王子各帳之事

官曰王子太師曰王子太保曰王子司徒曰王子司空

曰王子班郎君皆北面官 南面王傳府官曰王傳

親王內史府官曰內史曰長史曰叅軍 諸王文學館

官曰諸王教授曰諸王伴讀

金親王府屬官傳正四品掌師範輔導叅議可否若親王
在外亦兼本京節鎮同知府尉從四品本府長史從五
品 明昌三年改掌警嚴侍從兼總統本府之事司馬
從六品同檢校門禁總統府事文學二人從七品掌贊
導禮儀資廣學問記室叅軍正八品掌表箋書啟之事
大定七年八月始置二十年不專除令文學兼之

提舉衛紹王家屬提舉從六品同提舉從七品舊爲東
海郡侯邑令丞 提舉鎬厲王家屬提舉同提舉

以上宅

天興元年
始目便

提控鞏國公家屬提控同提控

元凡四十五王每位下各設王傅傳尉司馬三員傳尉惟
三王有之自此以下皆稱府尉別于王傅之下司馬之
上知事照磨各一人所領官相膳工等司 官相都總
管府至順二年罷官相府并鶴馭司改怯憐口錢糧總
管府爲公相府官杖與所轄諸司詳見總管府 膳工
司卿二人少卿二人丞二人掌人匠營造之事所領金
玉珠翠提舉司大都織染提舉司大都雜造提舉司共
三富昌庫一 內史府至元二十九年封晉王于瀋敗
王傅爲內史置官千四人給印分司京師并分置官屬
凡內史九人正二品中尉二人正三品司馬四人正四

品諮議二人從五品記室二人從六品照磨兼管勾承
發架閣從八品小吏有差 延慶司掌王府祈禳之事
使二人正三品同知二人正四品典簿一人從七品
斷事官理王府詞訟之事斷事官一十六人正三品經
歷知事各一人 典軍司秩從七品掌控鶴百二十有
六人典軍二員副使二員

皇明

國朝 王府官屬 洪武二年設 王相府左右相各一
人正二品左右傅各一人從二品叅軍一人錄事二人
紀善一人未幾申定官制相傳如故其叅軍司叅軍錄
事儀衛正副審理典設典祠典膳典服典工典醫典牧

紀善並有正副又有引禮舍人 八年改叅軍爲長史
九年罷王傳府左右相二人武相一人文相一人左
右傳二人武傳一人文傳一人長史二人錄事二人及
典籤司詔議官其護軍府增伴讀四人侍講四人選明
經慎行之士任之是年 秦王府武傳耿炳文兼陝西
行省右丞郭子興兼陝西行都督府僉事 晉王府武
傳汪興祖兼山西行都督府同知位武傳謝德成之上
華雲龍爲 燕相府左相顧時爲 秦相府右相 十
三年罷諸王相府設長史司左右長史各一人正五品
審理正一人正六品副一人正七品紀善正一人典寶
正一人俱正八品副俱從八品典膳正一人奉祀正一

人俱正八品副俱從八品典簿典樂典儀各一人俱正
九品典儀副一人教授一人伴讀一人俱從九品引禮
舍人倉大使副使庫大使副使俱未入流 郡王府典
膳正八品 二十八年置靖江 王府諮議所尋亦改
爲長史司 建文中增 親王官賓輔二人正三品伴
講伴讀伴書各一人長史一人左右長史各一人審理
正典膳正奉祠正良醫正典寶正並去正字審理副等
以爲副審理等 郡王賓友二人正四品教授一人記
室二人直史一人左右直史各一人吏目一人典印典
祠典禮典饌典藥五署典印典祠典禮典饌典藥各一
人典儀二人引禮舍人二人儀仗司吏目一人賓輔及

伴講伴讀伴書賓友教授進對俱侍坐稱名不稱臣見禮如賓師靖難後後故

祖訓云王府長史等曾經過犯之人不許選用其親王妃父原無官者授兵馬指揮郡王妃父授副兵馬指揮職銜俱不任事文職并族屬有女爲王妃或夫人及爲儀賓等見在及有子孫者不許除京職已故其無子孫者一體陞授

王府左長史一人右長史一人其屬典簿一人所屬衙門審理所審理正一人審理副一人典膳所典膳正一人典膳副一人奉祠所奉祠正一人奉祠副一人典樂一人典寶所典寶正一人典寶副一人紀善所紀善二

人良醫所良醫正一人良醫副一人典儀所典儀正一人典儀副一人引禮舍人一人工正所工正一人工副一人倉大使一人副使一人伴讀一人教授一人典膳一人

郡王府教授一人典膳一人鎮國將軍教授一人

長史掌王府之政令輔相規諷以匡王失王府

請名請封請婚及諸乞恩澤若陳謝進獻表啟書疏長史爲奏上下禮部議請王有過詰長史凡府寮皆統

於長史紀綱其職務典簿典出納文移審理正掌推按

刑獄禁詰暴橫無干國憲典膳正掌祭祀賓客王

妃膳羞之事奉祀正掌祭祀之事典賓正掌王寶及

符牌並副爲之貳紀善堂諷導禮法開諭古誼及國家
恩義大節以詔 王善長醫正掌療治疾病典儀正掌
陳儀式文物之事工正掌 官邸廨舍繕造修葺工役
之事並副爲之貳伴讀侍從起居陳說經史教授訓迪
德誼讐校典籍引禮舍人接對賓客贊相威儀倉掌祿
俸糧廩庫掌收藏金帛錢貨 郡王教授典膳將軍教
授如 王教授典膳

護衛指揮使司使同知僉事衛鎮撫所正副千戶所鎮
撫百戶並如衛掌儀從 王邸防禦非常凡有征行必
聽命於 朝廷

儀衛司儀衛正一人儀衛副二人典仗六人儀衛正掌

侍衛儀仗之事副爲之貳典仗聽命焉

國朝 親王就封必擇翰林二員輪講之國卽以長史從
故預選者多不悅 宣德中周文襄忱自刑部主事陞
越府長史未幾 越國絕遂陞侍郎巡撫南畿 正
統中推 邠府講讀相楊東里欲舉侍讀儀銘恐其怨
已乃以故人侍讀楊翁同進後 邠王入繼大統銘等
皆以從龍恩官至 官保

太祖洪武中 命選儒士授翰林院博士等官令于各
王府說書 永樂中亦妙簡官僚輔導諸王如以詹事
府丞周孟簡爲 襄王府左長史司直郎金寶爲 衛
王府左長史俾侍讀其後 親王出閣止選進士中老

成有學者除檢討及就封卽拜長史

孝宗弘治三年進士選長史者恣言怨詈吏部黜之然自是人薄長史多不以進士選除矣 十五年題准 各府長史等官但有年踰七十不肯告老或未及七十有病願告致仕者該府徑自具奏照依 詔書恩例俱加陞本府相應官員職銜行令致仕如無職銜可陞者授以該陞品級散官致仕

世宗嘉靖十二年題准 王府長史等官今後非真能輔導有功賢能可錄者不許請加服色品級其曾經提問有過者雖歷有年俸止照原銜供職衰老者只着致仕 今上萬曆九年題准 王府各官不拘見任候缺巡按御

史查其年六十五至七十八十歲以上納銀人員歷任
十年以上原由醫士樂舞生厨役出身歷任二十年以
上悉令致仕

鄭端簡公曉云 王府官不得外調陞不知起於何時
或曰靖難後事也然宣德中周忱以 越府長史陞侍
郎巡撫江西 鄭府長史王滄政行在戶部郎中洪熙
中 淮府長史王榮政吏科左給事 荆府長史曹曼
齡政翰林脩撰嘉靖八年大學士楊一清言楊士奇以
審理副選翰林編脩周忱亦自長史累陞尚書成化年
雷霖以 德府長史爲山西提學副史又言布政使
泰 泰府有姻亦陞巡撫部御史乞容 王官與別

一體陞用 王親亦選京官疏下吏部議云此 祖宗
微意近年江西稟性足爲監戒況 王親縱不得京任
得仕至左右布政使官與尚書等使非區區重內輕外
之心則展布才猷亦足自見一清請再議吏部執不可
遂已嘉靖二十二年 蜀府長史高鵬九年考滿至吏
部吏部請奪職遂請 王府官凡稱病乞改用者並勒
致仕輔導失職調者不得授府州縣親民官以故今人
一拜 王官遂視爲禁錮而落魄矣

太孫官屬

遼道宗以太子爲盜所害 太康六年設旗鼓搜刺六人
護衛王太孫 延禧十年三月命知制誥王師儒牌印

郎君耶律固傳導燕國王延禧 壽隆六年十二月詔

燕國王延禧擬注大將軍以下官

金元無考

皇明

皇太孫輔導講讀在洪武時具載集禮 成祖時以 東

宮官僚兼之永樂六年七月 命內閣胡廣等輔導

皇長孫 勅曰朕惟令德所成本於天性養性之學實

弘聖功故有聰明純一之資必有詩書禮樂之教所以

充德性而廣器識也 朕嫡長孫天章日表玉質龍資

孝友英明寬仁大度年未一紀體具志寧動必中規言

必合道好道之篤日夜孜孜日誦萬言心領要義朕嘗

試之以事輒能裁決得中斯實 宗廟之靈 上天賜
慶篤生異質以福祐天下而基 命於無窮然宏材之
建必由匠石之功圭瓚之成必假琢磨之力卿等皆茂
簡德藝職輔 東宮 東宮之子必資兼弼宜協同心
志輔導於成推廣仁義道德之源開陳二帝三王之治
與 高皇帝之大經大法凡創業守成之難生民稼穡
之事朝夕講論以涵養本源恢弘智量克其盛大之器
以爲 宗社生民之福 國家有無窮之休卿等亦有
無窮之聞欽哉九年九月 皇太子 命楊榮等侍
諸皇孫讀書 文華後殿且諭 諸皇孫曰此 皇祖
近臣汝輩當加禮敬又謂榮等曰他日學成卽汝訓迪

力也後 皇太子猷傳 上命召翰林院吏部官令舉
老成正大儒者侍 皇太孫講讀明日 東宮特召尚
書蹇義及楊士奇問得人否義對曰臣兩人共舉禮部
侍郎儀智然衆鮮知之議尚未決 東宮曰往老曾舉
李繼鼎大誤後悔不及智甚端正但覺老矣士奇對曰
智雖老然起家學官道理明執守正精神不衰 廷臣
老成未見其比是日午朝 上喜曰此得人矣雖年耄
識 朝廷大體能直言不阿向之元正日食呂震等皆
欲行賀禮惟此老與楊士奇言宜免賀朕從之智誠可
用遂 召禮部翰林諸臣 諭曰儀智甚好朕知之矣
今侍 太孫講讀令右贊善陳濟等充講官教諭林長

懋張英陳山戴倫等授給事中使侍 太孫已而俱授
春方左右中允

六院四轄

登聞檢院

遼南面有監院官曰知監院使屬門下省

金設官隸御史臺知登聞檢院從五品同知登聞檢院正
六品掌奏御進告尚書省御史臺理斷不當事知法從
八品女直漢人各一員 章宗太和四年右補闕楊廷
秀言自轉對官外復令隨朝八品以上外路五品以上
及出使外有可言者並許移檢院以聞則時政得失民
間利病庶可周知從之

元無

登聞鼓院

遼南面有登聞鼓院官曰登聞鼓使屬門下省景宗保寧二年始置

金海陵正隆二年始置登聞鼓院官曰知登聞鼓院從五

品同知登聞鼓院事正六品掌奏進告御史臺登聞檢

院理斷不當事

承安二年以諫官兼知法二員

女直漢人

各從八品

元順帝至元十八年四月立登聞鼓院

皇明

太祖洪武元年置登聞鼓于午門外日令監察御史

一人監之凡民間詞訟皆須自下而上或府州縣省官及按察司官不爲伸理及有冤抑機密重情許擊登聞鼓監察御史隨卽引奏其戶婚田土鬪毆相爭軍役等項具狀赴通政司并當該衙門告理不許徑自擊鼓守鼓官不許受狀後又移置於長安右門外令六科給事中并錦衣衛官各一員輪流直鼓收狀類進候 旨意一出卽差該直校尉領 駕帖備批 旨意於上連狀并原告押送各該衙門問理其有軍民人等故自傷殘恐嚇受奏者聽錦衣衛守鼓官校執奏追究教唆主使寫狀之人治罪所奏事情立案不行 七年議准重囚家屬於臨決前一日卽訴鼓狀該科簿暮封進凡有應

決應留囚數姓名次日午前傳出午後不須覆奏即便
行刑 十年議准重囚家屬俱于二覆奏 命下之日
投遞鼓狀該科叅詳與三覆本一同封進取 旨行刑
進奏院

遼南面有通進司官曰左通進曰右通進屬門下省

金御院通進屬宣徽院官屬見前

元順帝至正十七年置四方獻言使司階正三品掌考所
陳之言擇其善者以聞于上而舉行之詳定使二人副
使二人掌書記二人中書官提調之

皇明置通政司卽古納言之遺也歷唐宋爲銀臺司

太祖洪武三年置察言司設司令尋革 十年始置通政

使司正三品設通政使左右叅議經歷知事以曾秉正爲通政使建文中改司爲寺通政使爲通政卿通政叅議爲少卿寺丞增置左右補缺左右拾遺各一人靖難後復故

成祖永樂十九年定鼎北京其在留都者加南京二字官員裁削而大政悉出於北

本司通政使一人左右通政各一人左右叅議各一人膳黃右通政一人其屬經歷司經歷一人知事一人監生九人吏二十五人

通政使掌出納帝命通達下情關防諸司出入移狀奏報四方臣民實封及軍情聲息災異皆審署奏覆而

上下焉通政叅議爲之貳凡日常朝引奏人凡事月類
奏歲秒通奏凡四方雨澤歲秒 面奏凡有錯誤籍而
類請之凡在京詞狀判送法司推問凡出入文移以驗
正之記日照之記記之騰黃通政錄武官黃於 內府
覈其歸附征克陞轉銜所世流襲替之故以徵遷事經
歷知事典勘封題奏移狀

通政司月奏事例

凡內外各衙門一應公事用題本其雖係公事而循例
奏報奉 賀若乞 恩認罪繳 勅謝 恩并軍民人
等陳情建言伸訴等事俱用奏本

官誥院

遼南面有誥院官曰誥院給事重熙末耶律鐸幹嘗居此職

金官誥院提舉二員掌署院事以吏部郎中翰林修撰各一人充屬于吏部見前元無

皇明設 誥勅二房屬 內閣

審計院

掌錢穀出入之政

遼南面上京有鹽鐵使司東京有戶部使司中原有度支使司南京有三司使司而西京有計司其設官曰使曰知使事曰副使曰同知使事曰判官外有長春路錢帛司有遼西路錢帛司有平州路錢帛司其官各置錢帛

都點檢

金章宗太和八年省戶部官員置三司謂兼勸農鹽鐵度支戶部三科也 貞祐中罷之其官使一員從二品副使一員正三品簽三司事一員正四品同簽三司事一員正五品掌勸農鹽鐵度支判官三員從六品本參幹官 大安元年更參議規措審計官三員正七品掌同參幹官知事二員從七品勾當官二員正八品管勾架閣庫一員正八品知法三員從八品

元錢穀出納事掌于戶部分屬于總管府而審計院不設 皇明亦統于戶部

糧料院

掌諸軍糧料事

遼無考

金京東西南三路置檢察司使從六品副使正七品掌檢察支散軍糧驗軍戶實給均軍戶差役勸農種毋犯私殺馬牛私鹽酒麴

元度支掌馬駝芻粟事領于度支院其掌軍糧事止運糧屬兵部餘無考

皇明皆統于戶兵二部

權貨務都茶場附流泉務店宅務

遼無考

金權貨務

在京諸稅係中運司見錢皆權于本務收

使從六品副使從七品掌

發賣給隨路香茶鹽鈔引屬尚書戶部

南京權貨務

提舉從六品 中都都商稅務司使一員正八品副使
一員正九品掌從實辦課以佐國用都監一員從九品
掌簽署文簿巡察鹽稅 又中都置流泉務 大定十
三年上謂宰臣曰聞民間質典利息重者至五七分或
以利爲本小民苦之若官爲設庫務十中取一爲息以
助官吏廩給之費似可便民卿等其議以聞有司奏于
中都南京東平真定等處并置質典庫以流泉爲名各
設使副一員凡典質物使副親評價直許典七分月利
一分不及一月者以日計之經二周年外又踰月不贖
卽聽下架出賣出帖子寫作質物人姓名物之名色金
銀等第分兩及所典年月日錢貫下架年月之類若亡

失者收贖日勒合千人驗元典官本并合該利息倍償
入官外更勒庫子驗典物日上等時估償之物雖故舊
依新價償仍委運司佐貳幕官識漢字者提控若有違
犯則究治每月具數申報上司 大定二十八年十月
京府節度州添設流泉務凡二十八 明昌元年皆罷
之二年在都依舊存設使一員正八品副使一員正九
品掌解典諸物流通貨泉勾當官一員此務古所無也
又中都設店宅務管勾四員正九品各以二員分左
右廂掌官房地基徵收官錢檢料修造摧毀房舍南京
有店宅務舊屬太府 又中都有都麴使司使從六
品副使正七品掌監知人戶醞造麴藥辦課以佐國用

餘酒使監醞辦課同此都監二員正八品掌簽署文簿
檢視醞造凡京都及真定皆爲都麴酒使司設官吏同
此他處置酒使司課及十萬貫以上者設使副小都監
各一員五萬貫以上者設使副各一員一萬貫以上者
設使及都監各一員不及二萬貫者爲院務設都監同
監各一員不及千貫之院務止設都監一員其他稅醋
使司及榷場與酒稅相兼者視課多寡設官吏皆同此
諸酒稅使三萬貫以上者正八品諸酒榷場使從七品
五萬貫以上副使正八品

京都別院及倉場使

金中都左右廂別貯院使一員從八品副使一員正九品

判官從九品掌拘收退材等物及出納之事 中都木
場使一員從八品副使一員判官一員皆正九品掌拘
收材木諸物及出納之事 諸倉使正八品副使正九
品掌倉廩畜積受納租稅支給廩祿之事 草場使副
使掌儲積受給之事攬典二人場子掌積聚出納看守
巡護之事歲收五萬以上設二人中都南京歸德河南
京兆鳳翔依此置西京省副使餘京節鎮科設使副一
員勅刺仍舊置都監一員 南京諸倉監支納官草場
監支納官正八品 南京提控規運柴炭場使正八品副
使正六品 京師規運柴炭場使正八品副使從八品
元稅務提領大使副使各一員領于各路總管府

雜買雜賣務

遼不設

金有市買司 天德二年更市買局屬太府監官制見前

又買物司使一員從八品副使一員正九品掌收買官
中所用諸物都監四員從九品掌支應等事

元有廣議司總和顧和買事屬留守司官秩見本司

文思院

諸綾錦院附

遼南面中京置文思院官曰中京文思使馬人望父佺嘗

署此職

金文思署隸于少府監官制見前 諸綾錦院

置于真定平陽太原

河間使一員正八品副使一員正九品掌織造常課凡

段之事

元織造織染等事皆屬于工部而文思院不設

左藏庫

遼南面內藏庫屬內省內庫屬內侍省官制皆見前

金左藏庫右藏庫皆由太府監官制見前 交鈔庫使一

員正八品掌諸路交鈔及檢看錢鈔換易收支之事副

使從八品掌書押印合同判官正九品都監二員 印

造鈔引庫使一員從八品副正九品判正九品掌監視

印造勘覆諸路交鈔鹽引兼提控抄造鈔引紙 鈔紙

坊使從八品副正九品判從九品 交鈔庫物料場場

官一員正九品掌收支交鈔物料隨處交鈔庫抄紙坊

使從八品以上皆屬尚書戶部 法物庫使從六品副
使從七品掌鹵簿儀仗車輅法服等事直長正八品此
屬尚書兵部 外有中都廣備庫使一員從七品副使
一員從八品判官一員正九品掌尺帛顏色油漆諸物
出納之事 又有永豐庫鑄鐵院都監隸焉使一員從
七品副使一員從八品判官一員正九品掌貨泉金銀
珠玉出納之事 鼓鑄院都監二員管勾生熟鐵釘線
南京交鈔庫使一員正八品副使一員正九品掌出入
錢鈔兌便之事 南京豐行東西庫始隸運司貞祐
二年同隨朝使
正八品副使從八品判二員正九品監支納各一員正
八品

元中藏庫左藏庫右藏庫皆屬太府監官制見前
皇明審計糧料倉場俱屬戶部樞務雜賣俱戶工二部分
理

司隸校尉

遼無司隸校尉之名五京各置警巡院官曰警巡使東京
別置軍巡院官曰東京軍巡使中京別置巡邏司官曰
中京巡邏使所掌皆司隸校尉事也 興宗重熙十三
年又置契丹警巡院

金諸京置警巡院使一員正六品掌平理獄訟警察別部
總判院事副一員從七品掌警巡之事判官二員正九
品掌檢稽失簽判院事一員

按司隸校尉惟漢有之掌巡察奸猾之事唐以後俱不設而採訪一職近之遼金有諸京警巡院古無是官其所掌畧與司隸同故附其下

元上都留守司屬有警巡院秩正六品達魯花赤一員警巡使一員副使二員判官二員司吏八人 大都兵馬都指揮使司屬有左右警巡院秩正六品達魯花赤各一員使各一員副使判官各三員典史各三人司吏各二十五人 至元六年置領民事及供需視上都 大都警巡院品職分置如左右院達魯花赤一員使一員副使一員判官二員典史二員司吏二十人 大德九年置以治都城之南其所職微與遠不同且總不如司

隸之持節而權重也

皇明巡警改置中東西南北城兵馬指揮司國初設兵馬
指揮司都指揮副都指揮知事尋改兵馬指揮司指揮
使副指揮知事城門設兵馬 洪武十年改爲指揮副
指揮革知事 二十三年定爲兵馬指揮司正六品
建文中改爲五城兵馬司指揮副指揮爲兵馬副兵馬
靖難後復故

本司各指揮一人副指揮五人其屬吏目一人吏六人
指揮掌巡捕盜賊街道溝渠囚犯火禁之事副指揮爲
之貳吏目受事發展

穆宗隆慶四年九月御史趙可懷言五城掌印兵馬宜取

科貢正途年壯有志行者任之職檢死傷理盜賊刑名而一切奔走瑣務則屬副兵馬各上官接遇之禮及陞轉之格視兩京知縣如不職者聽巡城御史不時糾劾仍候五年大察各城御史交代時第其考語送部以備查考

都督

遼南面遼陽大都督府 太宗會同二年置官曰遼陽大都督以曷魯泊爲之關防遼陽東都

金海陵南伐時立左右領軍大都督將三十二總管

元初有山東河北蒙古軍大都督府秩從二品掌各路軍民科差進征及調遣總攝軍馬公事 至元二十一年

罷統軍司統元帥府立蒙古軍都萬戶府 大德七年
改山東河北蒙古軍都萬戶府 延祐五年罷 天曆
二年改立爲大都督府定置大都督三員正二品同知
一員正三品副都督三員從三品僉都督事二員正四
品經歷二員從六品都事二員從七品管勾一員照磨
一員俱正八品所屬附見 左手萬戶府萬戶一員副
萬戶一員經歷一員知事一員提控案牘一員鎮撫一
員千戶九翼千戶一十一員百戶七十二員彈壓一十
一員 右手萬戶府設官如左手 千戶九翼千戶九
員百戶六十三員彈壓九員 拔都萬戶府達魯花赤
一員萬戶以下同上 千戶六翼千戶七員百戶四十

一員彈壓五員 哈答萬戶府達魯花赤一員萬戶一員經歷以下同上 千戶八翼達魯花赤二員千戶六員百戶四十六員彈壓九員 玳都哥萬戶府達魯花赤一員萬戶以下同上 千戶七翼外有哈必赤千戶翼洪澤屯田千戶趙國宏翼設官大畧皆同二翼直隸大都督府 左翊蒙古侍衛親軍都指揮使司 右翊蒙古侍衛親軍都指揮使司 虎賁親軍都指揮使司 三司官秩詳具左右衛門 以上俱屬山東河北蒙古軍大都督府

左欽察衛秩正三品 至元二十三年依河西等衛例立欽察衛設官十員 至治二年分爲左右衛 天曆

二年撥隸大都督府定置達魯花赤一員正三品都指揮二員正三品副使二員從三品僉事二員正四品經歷二員從七品知事照磨各二員並從八品鎮撫一員行軍千戶十八所達魯花赤各一員千戶三十六員百戶一百八十員彈壓一十八員屯田千戶所二達魯花赤二員千戶二員百戶二十員彈壓二員門尉二員儒學教授一員

右欽察衛分撥同左都指揮使三員正三品副都指揮二員從三品僉事二員經歷二員從七品知事二員照磨一員從八品鎮撫二員行軍千戶所一十翼千戶一十員百戶八十二員彈壓九員興魯官四員守城

千戶所一翼達魯花赤一員千戶一員百戶九員彈壓一員屯田千戶所一翼達魯花赤一員千戶一員百戶十員彈壓一員教官儒學教授一員

龍翊侍衛親軍都指揮使司秩正三品天曆元年始立都指揮使二員從三品僉事二員正四品經歷一員從七品知事一員照磨一員並從八品鎮撫二員行軍千戶所九翼達魯花赤一員千戶六員副千戶一員百戶四十五員彈壓五員屯田一翼欽察千戶所達魯花赤一員千戶一員百戶二十二員彈壓二員教官蒙古字教授二員儒學教授一員

哈刺魯萬戶府掌守禁門等處應直宿衛至元二十

三年招集哈剌魯軍人立萬戶府 大德二年置司南陽 天曆二年奏隸大都督府定置官達魯花赤一員萬戶一員副萬戶一員經歷知事各一員提控案牘一員鎮撫一員吏目一員 千戶所三翼千戶三員百戶九員彈壓三員

大都督分府 至正十八年以東安瀋州柳林日有警報京師備禦四隅俱立大都督分府其官吏視都城減半 都督之職 順帝至元四年立紹熙府軍民都總使司以御史大夫脫脫兼充使治書侍御史吉當普爲副使世襲其職

大都督兵農司至元十九年置于西京以孛羅帖木兒

領之從其所請也仍置分司十道專掌屯種之事

皇明

五軍都督府建置 國初置統軍大元帥府樞密院甲辰
革樞密總管萬戶定爲指揮千百戶總小旗又革都護
統軍元帥萬戶府 辛丑立大都督府正一品以朱文
正爲大都督節制中外諸軍事又設左右都督都督同
知都督僉事及斷事官 洪武十三年分中左右前後
五軍都督府正二品尋改正一品又設左右斷事官
十五年置五軍十衛叅軍府 二十三年置五軍斷事
司曰稽義稽禮稽智稽信 建文中革斷事官及五司
官又令武官襲替兵部同五府取 旨 靖難後復舊

官而斷事五司遂不復設 永樂元年置行後軍都督府於北京已而分五府稱行在某軍都督府罷行後軍都督府 十八年除行在在應天者加南京字 洪熙元年復稱行在仍設行後軍都督府 宣德三年又革行後軍都督府 正統六年復除行在凡公侯伯及三等直署都督並得充總兵副總兵

中左右前後五軍都督府每府左右都督各一人都督同知二人都督僉事二人 恩功寄祿無常員其屬經歷司經歷一人都事一人

都督掌軍旅公侯伯及三等都督領之貳亦如之各領其都司衛所以達於兵部凡武職流官世官土官襲替

優給優養所衛都司上府引奏送兵部請選既選移府
下都司衛所凡首領官聽吏部者選授給由亦如之凡
武職 誥勅旗役併鎗水陸步騎操練俸糧屯種器械
舟車賞賜聲息軍情清勾替補邊腹盡圖貼說薪炭荆
葦之事分移所司而綜理之經歷典出納文移都事佐
之

元帥 宣慰附

遼北面有天下兵馬大元帥府以太子親王總軍政官曰
天下兵馬大元帥曰副元帥有大元帥府以大臣總軍
馬之政官曰大元帥曰副元帥有都元帥府以大將總
軍馬之政官曰兵馬都元帥曰副元帥曰同知元帥府

事 興宗重熙四年改南京總管府爲元帥又有便宜從事府官曰便宜從事

金元帥府天會三年伐宋更西南西北兩路都統府爲元帥府官曰元帥從一品曰左副元帥正二品曰右副元帥正二品曰左監軍正三品曰右監軍正三品曰左都監從三品曰右都監從三品其都元帥必以諸班勃極烈爲之恒居守不出 泰和時每行軍則樞密院更爲元帥府罷則復舊員祐時沿河諸路設行元帥府大者有便宜之號小者有從宜之名 元光時招義軍設總領提控故時皆稱元帥爲總領下有經歷一員都事一員知事一員正七品檢法一員從八品

元

初於北庭曲先塔林蒙古軍征東等四處立都元帥府於李店文州帖城河裏脫洋朵甘思當陽岷州洮州十八族脫思馬積石州等九處立元帥府都元帥府置都元帥二人副元帥二人元帥府置達魯花赤一人元帥一人李店文州增置同知副元帥各一人又有吐蕃宣慰司元帥府所屬有脫思麻路軍民萬戶府有西夏中興河州等處軍民總管府其烏思藏納里速古魯孫等三路宣慰使司都元帥府所屬凡二十餘所皆夷地不具錄俱隸宣政院

宣慰司掌軍民之務分道以總郡縣行省有政令則布

於下郡縣有請則爲達於省有邊郵軍旅之事則兼都
元帥府品秩員數各有等差 宣慰使司使三員從二
品同知一員從三品副使一員正四品經歷都事照磨
兼架閣管勾各一員正九品凡六道 山東西道益都
路置 河東山西道大同路置 淮東道揚州置 東
道慶元路置 荆湖北道中興路置 南道天臨路置
按世祖至元十三年平宋置五道宣慰使浙東西江東
西湖南也十八年置安南宣慰司二十九年以汪惟和
爲暹昌二十四處都總帥亦元帥職也

宣慰使司都元帥府使三人同知副使各二人經歷知
事各二人照磨兼架閣管勾一人凡八府 廣東道 廣

州置

大理金齒等處

蒙慶等處

少使一人同知副使各一人

廣西兩江道

靜江路置

海北海南道

福建道

察

罕腦兒等

八番順元等處五府多宣慰使都元帥三

人副都元帥僉都元帥事各二人

至正間復立湖南

山東東西荆湖北諸道與邦牙永昌淮東興元江州諸

處八宣慰使司都元帥府在邦牙者以其酋長來貢方

物故立官府以獎異永昌以其地連西番為其所擾故

置司以治之山東山西掌屯駐軍馬之事淮東統制義

兵萬戶府并洪澤等處義兵招誘富民出丁壯五千名

者為萬戶五百名者為千戶一百名者為百戶降宣勅

牌面與之置司泗州天長縣江州宣慰使都元帥廷授

佐貳僚屬江西行省平章政事承繼署之

宣慰使兼管軍萬戶府宣慰使三員同知副使各一員
經歷一員都事二員照磨兼管勾一員凡三府 曲靖
等路 羅羅斯 臨安廣西道元江等處

分元帥府至正八年以福建盜起命汀漳二州立分元
帥府以討捕之又置於沂州以鎮禦東海羣盜 十一
年又置於湖南寶慶路與寶武又置山東分元帥府於
登州提調登萊寧海三州三十六處海口事 十二年
又置安東安豐八處分元帥府 水軍元帥府 至正
二十六年置河淮水軍元帥府於孟津

皇明

國初設元帥府有翼元帥都元帥副元帥等官後改五軍都督府以統戎事遂革元帥之職

本朝宣慰使司皆土官世襲有使有同知有副使有僉事而經歷都事則用流官

太祖洪武二十九年六月戊子朔己丑置思南宣慰使司時思南宣慰使田仁智遣其都事楊深來歸欵并納元所授宣慰使告身上曰仁智僻處遐荒世長溪洞乃能識天命率先來歸可嘉也俾仍爲思南道宣慰使授深思州等處軍民宣撫使兼新軍萬戶以三品銀印給授之

宣撫

元

遼金無宣撫之職 元宣撫司秩正三品每司達魯花赤

一員宣撫一員同知副使各二員僉事一員計議經歷

知事各一員提控案牘架閣一員損益不同者各附見

于下 廣南西道不置副使僉事 麗江路以上隸雲南省 順元等

處 播州 思州以上隸湖廣省 敘州等處隸四川省不置僉事計議

世祖中統元年立十路宣撫司以賽典赤李德輝為燕京

路宣撫使徐世隆副之宋子貞為益都濟南等路宣撫

使王磐副之河南路經畧使史天澤為河南宣撫使楊

果為北京等路宣撫使趙昞副之張德輝為平陽太原

等路宣撫使謝瑄副之李魯海牙劉肅並為真定路宣

撫使姚樞爲東平路宣撫使張蕭副之中書左丞張文
謙爲大名彰德等路宣撫使游顯副之粘合南合爲西
京路宣撫使崔巨濟副之廉希憲爲京兆等路宣撫使
二年四月乙卯詔十路宣撫使量免民間課程勸農
桑抑游惰禮高年問民疾苦舉文學才識可以從政及
茂才異等者列名上聞以聽擢用其職官汚濫及民不
孝弟者量輕重議罰

成宗大德七年詔遣奉使宣撫循行諸道以郝天挺搭出
往江南江北石珪往燕南山東耶律希逸劉賡往河南
陝西鉄里脫歡戎益往兩浙江東趙仁榮岳叔謨往江
南湖廣木八剌陳英往江西福建塔斥海牙劉斂中往

山北遼東並給二品銀印仍降詔戒飭之 是年十一月七道奉使宣撫所罷職污官吏凡一萬八千四百七十三人贓四萬五千八百六十五錠審冤獄五千一百七十六事

泰定帝二年九月分天下爲十八道遣使宣撫按問官吏不法詢民疾病審理冤滯凡可以興利除害從便舉行有罪者四品以上停職申請五品以下就決有政績卓異及晦迹丘園才堪輔治者以名聞以湖廣叅政馬合謀河東宣慰使李處恭往兩浙江東道江東廉訪使朶列禿太史院使齊履謙往江西福建功德使林舉伯荆湖宣慰使蒙弼往江南湖廣禮部尚書李家奴工部尚

書朱賁往河南河北樞密院同知阿吉刺御史中丞曹
立往燕南山東太子詹事別刺木兒宣徽院判韓讓往
河東陝西吏部尚書納答出董訥往山北遼東中書斷
事官韓廷茂陝西運事僧家奴往雲南湖廣宣慰使寒
食冀寧路總管劉文往甘肅山東宣慰使禿思帖木兒
陝西右丞廉惇往四川翰林侍講學士帖木兒不花秘
書郎吳秉道往京畿

順帝至元四年因監察御史言四川在宋時有紹熙一府
統六州二十縣一百五十二鎮近年雍梁淮甸人民見
彼中田疇廣濶開墾成業者凡二十餘萬戶省部定議
遂奏置紹熙等處軍民宣撫司正官六人宣撫使同

副使各二人首領官二人經歷知事提控案牘各一人
司獄蒙古儒學教授各一人所轄下州四下縣五巡檢
司十三六年因臺臣言裁減冗官遂罷之 至正五年
冬十月遣使宣撫巡行天下命江西左丞忽都不丁吏
部尚書何執禮巡兩浙江東雲南右丞散散將作院使
王士弘巡江西福建大都路達魯花赤拔實江浙叅政
奉從德巡江西湖廣吏部尚書定僧宣政僉院魏景道
巡河南河北資政院使蠻子兵部尚書李獻巡燕南山
東兵部尚書不花樞密院判斬義巡河東陝西宣政院
同知伯家奴宣徽僉院王也速迭兒巡山北遼東湖北
宣慰使阿乞刺兩淮運使杜德逮巡雲南上都留守阿

牙赤陝西左丞王紳巡甘肅大都留守答爾麻失里河
南叅政王守誠巡四川前西臺中丞定定集賢學士蘇
天爵巡京畿平江路達魯花赤左納答失里都水監賈
惟貞巡廣海皆使布宣德意詢民疾苦疏滌冤滯蠲除
煩苛體察官吏賢否明加黜陟有罪者四品以上停職
申請五品以下就便處決民間一切興利除害之事悉
聽舉行其餘必合上聞者條具入告十一年以永順安
撫司改永順宣撫司十五年以雲南降置平緬宣撫
司以羈縻之十七年又詔以中書左丞也先不花御
史中丞成遵奉使宣撫彰德大名廣平東昌東平曹濮
等處獎勵將帥

按唐宋宣撫皆大將軍之任以武臣爲之宋間有一二文臣任者元之宣撫職在詢民疾苦體察官吏賢否以行省官或諸部尚書與諸院使充之此卽唐巡察按察巡撫等使且至元元和之間亦有諸道宣撫使審此則不宜入宣撫類矣至正時復置平緬宣撫使則其職又似宋之招撫使故附於其後云

皇明倣元制設宣撫司皆土官世襲其正官有宣撫有同知有副使有僉事其經歷司有經歷有知事則用流官亦不常設

太祖洪武元年六月癸巳朔 戊戌湖廣安定等處宣撫使向思明等遣其溪洞長官硬徹津等以元所授宣撫

勅及印章來上請改授官 命仍置安定等處宣撫司
設宣撫使二以思明及其弟思勝爲之又置懷德軍民
宣撫司宣撫使一以向大旺什用爲之統軍元帥三以
南木什用潘仲玉爲之抽攔不夜 石三洞各置長官
一以沒葉什用大虫什用硬徹津爲之以幹坪洞元帥
府設元帥一以向顯祖爲之梅梓麻寮二洞各置長官
以向志明唐漢明爲之

大撫軍院

元至元二十七年命皇太子總天下軍馬置大撫軍院從
一品知院四員同知二員副使一員同僉一員首領官
有經歷都事各二員照磨兼管勾一員明年詔罷之

皇明無

監軍

遼樞密院都統下有監軍行軍時又有監戰又有行軍都
監其北面分制諸路者諸部署司諸指揮使司諸統軍
司皆有都監南面指揮使亦有都監西北路招討司亦
有監軍一員俱見各衙門下 聖宗統和十二年復置
南京統軍都監十四年東邊諸軍各置都監 興宗重
熙十二年置回跋部詳穩都監十九年置倒塌嶺都監
蓋皆古監軍職也

金天會三年以伐宋更都督府爲元帥府自元帥副元帥
而下置左右監左右都監 天德二年九月置統軍司

于山西河南陝西三路以元帥府都監監軍爲使
元無考

皇明無定員惟用兵則設或以御史或以按察司官領勅
行事

續文獻通考卷之九十六終